



KEMENTERIAN PERALIHAN TENAGA  
DAN TRANSFORMASI AIR

# KENYATAAN MEDIA

## BELANJAWAN 2025 BERPAKSIKAN RAKYAT

**PUTRAJAYA, 18 OKTOBER 2024** – Belanjawan 2025 yang dibentangkan YAB Perdana Menteri berpaksikan “Rakyat First” sekaligus membuktikan kesungguhan kerajaan dalam menjamin kesejahteraan rakyat, mengangkat martabat rakyat dan menjunjung hak rakyat.

Menerusi pengumuman Belanjawan 2025, fokus utama kerajaan adalah menjana perubahan menerusi tanggungjawab fiskal dan tadbir urus, membugar ekonomi dengan menaikkan siling menerusi peningkatan produktiviti dan pendapatan negara serta mensejahterakan rakyat menerusi meninggikan lantai taraf hidup dan memperkukuh keselamatan sosial.

### **Sabah dan Sarawak**

Peruntukan pembangunan Sabah dan Sarawak terus diberi keutamaan dan adalah yang tertinggi antara negeri iaitu masing-masing RM6.7 bilion dan RM5.9 bilion.

Pemberian Khas Sarawak tidak pernah dikaji sejak 1969. Di bawah MADANI, tahun ini kita telah menaikkan kadar kepada RM300 juta ketimbang RM16 juta (Sarawak) dan RM125.6 juta (Sabah). Mulai 2025,

Kerajaan bercadang menaikkan kadar Pemberian Khas Sarawak dan Sabah sekali ganda lagi kepada RM600 juta.

Sebanyak 17 pakej kerja Pan Borneo Sabah Fasa 1B telah dikeluarkan SST dengan nilai kontrak RM9.7 bilion. Ini meliputi jajaran Kota Belud ke Kudat; Tawau ke Kampung Lot M dan Telupid ke Ranau. Sementara, Pan Borneo Sarawak dijangka siap November 2024. Secara keseluruhan, Projek Pan Borneo Sarawak dan Sabah telah menelan belanja sebanyak RM25.1 bilion.

Kerajaan telah memuktamad empat pakej kerja *Sabah Sarawak Link-Road* (SSLR) Fasa 2 bernilai RM7.4 bilion. Dua pakej sudah dianugerahkan, manakala baki pakej sebelum hujung tahun.

Kerajaan juga bersetuju melaksanakan Projek Pembesaran Lapangan Terbang Tawau, Sabah dan Lapangan Terbang Miri, Sarawak dengan kos RM253 juta.

Kerajaan Persekutuan dan Sarawak bekerjasama membangunkan Pusat Kanser Sarawak yang dianggarkan RM1 bilion dengan kesediaan Sarawak yang mendahulukan pembiayaan bagi pembinaan projek.

### **Kementerian Peralihan Tenaga dan Transformasi Air (PETRA)**

PETRA menyambut baik Belanjawan 2025 yang turut mengangkat martabat rakyat menerusi lonjakan reformasi ekonomi dari sudut kemampanan sumber tenaga dan air.

Belanjawan 2025 memfokuskan kepada pembangunan sektor tenaga dan air, dengan jumlah peruntukan secara keseluruhan sebanyak RM4.95 bilion. Ia meliputi perbelanjaan mengurus sebanyak RM362.67 juta dan perbelanjaan pembangunan berjumlah RM4.59 bilion.

Dengan situasi semasa perubahan iklim yang semakin ketara hingga mengakibatkan cuaca ekstrem dan mendorong kepada kejadian banjir, PETRA terus komited untuk melaksanakan projek Tebatan Banjir sebagaimana diumumkan dalam Ucapan Belanjawan 2025.

Setakat ini, Kerajaan telah berjaya menyiapkan lapan (8) projek Rancangan Tebatan Banjir (RTB) bernilai RM540 juta. Seterusnya, 12 projek RTB dengan kos RM3 bilion telah dikeluarkan Surat Setuju Terima (SST) pada tahun 2024 dan berjalan mengikut jadual yang melibatkan:

- i. RTB Sungai Damansara, Selangor;
- ii. RTB Sungai Likas, Kota Kinabalu, Sabah;
- iii. RTB Sungai Triang, Bera, Pahang;
- iv. RTB Sungai Tepoh dan Banggol Air Lilih, Kuala Nerus, Terengganu;
- v. Pembangunan Lembangan Sungai Bersepadu Sungai Kelantan Fasa 2, Kota Bharu.

Dalam menghadapi musibah banjir kilat yang melanda ibu kota dan beberapa bandar lain, sebagai langkah segera, penyaluran RM150 juta kepada PBT dan Jabatan Pengairan dan Saliran untuk mulakan kerja pembersihan longkang dan pengorekan sungai.

Antara pengumuman lain menerusi Belanjawan 2025 kali ini yang berkaitan Kementerian adalah:

- i) Kemudahan lebih RM300 juta yang disediakan di bawah Dana Mudah Cara Peralihan Tenaga, bagi menggalakkan lagi pelaksanaan inisiatif dan projek berkaitan peralihan tenaga.
- ii) Program *Net Energy Metering* (NEM) dilanjutkan kepada 30 Jun 2025 agar lebih banyak bumbung premis dimanfaatkan untuk pemasangan solar *photovoltaic* (PV).
- iii) Pelaksanaan Pembiayaan Teknologi Hijau (GTFS) diteruskan dengan pembiayaan sebanyak RM1 bilion sehingga tahun 2026.
- iv) Beberapa projek *National Energy Transition Roadmap* (NETR) juga memasuki fasa pelaksanaan:
  - a. Ladang Solar Terapung Hidro Hibrid Kenyir dan hab hidrogen hijau Terengganu – 1,000 megawatt; dan
  - b. Program *Large Scale Solar* (LSS).
- v) Peruntukan RM70 juta yang disediakan bagi menggalakkan pembelian kelengkapan elektrik cekap tenaga dalam bentuk e-rebat bagi pengguna domestik dan sektor industri. Dengan pelaksanaan program ini, negara dapat menjimatkan 571 Gigawat jam setahun bersamaan dengan RM112 juta.

vi) Pelaksanaan Kontrak Prestasi Tenaga untuk semua agensi Kerajaan sebagai salah satu inisiatif kecekapan tenaga di sektor awam (*Government Lead by Example*).

Belanjawan 2025 jelas memperlihatkan tekad Kerajaan Persekutuan dalam mengutamakan rakyat dan mengangkat martabat rakyat, membetulkan ketidakcekapan masa lalu dan membina asas kukuh dan mampan untuk pertumbuhan masa depan negara. Ini termasuk dengan memperkasakan pelaksanaan agenda serta dasar peralihan tenaga dan transformasi air, demi manfaat rakyat secara holistik dan bersepadu.

**YAB DATO' SRI HAJI FADILLAH BIN HAJI YUSOF**  
**TIMBALAN PERDANA MENTERI DAN MENTERI PERALIHAN**  
**TENAGA DAN TRANSFORMASI AIR**  
**18 OKTOBER 2024**